

四庫全書

集部

欽定四庫全書

集部

古今禪藻集卷一

詳校官庶吉士_臣謝恭銘

主事銜_臣徐以坤覆勘

總校官庶吉士_臣倉聖脉

校對官中書_臣葉 葵

謄錄監生_臣任 鑑

欽定四庫全書

集部八

古今禪藻集

總集類

提要

臣等謹案古今禪藻集二十八卷明釋正勉性通全編其裒輯則釋普文也普文字理菴正勉字道可並嘉興人性通字蘊輝應天人所錄皆釋子之作而不必其有關於佛理曰禪藻者猶曰僧詩云爾所載上起晉支遁下

訖性通所自作以朝代編次每代之中又自分諸體中間如宋之惠休唐之無本後皆冠巾仕官與宋之道潛老而造禍官勒歸俗者不同一概收之未免泛濫又宋倚松老人饒節後為僧名如璧陸游老學菴筆記稱為南渡詩僧之冠與葛天民卒返初服者亦不同乃遺而不載亦為踈漏至寶月行路難鍾嶸詩品明言非其所作載構訟納賂事甚悉而

仍作僧詩皆未免失于考訂他如卷一之末
獨附讚銘誄賦蓋以六朝篇什無多借盈卷
帙然以此為例則諸方偈頌孰非有韻之文
正恐累牘連篇汗牛難載於例亦為不純特
其上下千年網羅頗富較李龔唐僧弘秀集
惟取一朝之作者較為完具存之亦可脩採
擇焉乾隆四十三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

古今禪藻集卷一

明釋正勉釋性通同輯

晉詩

四月八日讚佛詩

支遁

二十
三首

三春迭云謝首夏含朱明祥祥今日泰朗朗玄夕清菩
薩彩靈和眇然因化生四王應期來矯掌承玉形飛天
鼓弱羅騰曜散芝英綠瀾顏龍首縹蓋翳流鈴芙蓉育

神葩傾柯獻朝榮芳津沛四境甘露凝玉瓶珍祥盈四
八玄黃曜紫庭感降非情想恬泊無所營玄根泯靈府
神條秀形名圓光朗東旦金姿豔春精含和總八音吐
納流芬馨跡隨因溜浪心與太虛冥六度起窮俗八解
濯世纓慧澤融無外空同忘化情

詠八日詩三首

大塊揮冥樞昭昭兩儀映萬品誕遊華澄清凝玄聖釋
迦乘虛會圓神秀機正交養衛恬和靈知溜性命動為

務下尸寂為無中鏡

其二

真人播神化流淳良有因龍潛堯術邑漂景閭浮瀕佇
駕三春謝飛轡朱明旬八維披重藹九霄落芳津玄祇
獻萬舞般遮奏伶倫淳白凝神宇蘭泉渙色身投步三
才泰揚聲五道泯不為故為貴忘奇故奇神

其三

緬哉玄古思想託因事生相與圖靈器像也像彼形黃

裳羅帕質元服拖緋青神為恭者惠跡為動者行虛堂
陳樂餌蔚然起奇榮疑似垂噦微我諒作者情於焉遺
所尚肅心擬太清

五月長齋詩

炎精育仲氣朱離吐凝陽廣漢潛涼燮凱風乘和翔令
月肇清齋德澤潤無疆四部欽嘉期潔已升雲堂靜晏
和春暉夕惕厲秋霜蕭條詠林澤恬愉味城傍逸容研
沖蹟綵綵運宮商匠者握神標乘風吹玄芳淵汪道行

深婉婉化理長疊疊維摩虛德音暢遐方單牢妙傾玄
絕致由近藏畧畧微容簡八言振道綱拔煩練陳句臨
危折婉章浩若驚飈散迴若揮夜光寓言宜所託意得
筌自喪需濡妙習融靡靡輕塵亡蕭索情牖頽寥朗神
軒張誰謂冥津遐一悟可以航願為海遊師權施入滄
浪騰波濟漂客玄歸曾道場

八關齋詩三首

并序

間與何驃騎期當為合八關齋以十月二十二日集

同意者在吳縣土山墓下三日清晨為齋始道士白衣凡二十四人清和肅穆莫不靜暢至四日朝衆賢各去余既樂野室之寂又有掘藥之懷遂便獨住於是乃揮手送歸有望路之想靜拱虛房悟外身之真登山採藥集巖水之娛遂援筆染翰以慰二三之情建意營法齋里仁契朋儔相與期良晨沐浴造閒丘穆穆升堂賢皎皎清心修窈窕八闕客無捷自綢繆寂默五習真疊疊勵心柔法鼓進三勸激切清訓流悽愴願

弘濟闔堂皆同舟明明玄表聖應此童蒙求存誠夾室
裏三界讚清休嘉祥歸宰相藹若慶雲浮

其二

三悔啟前朝雙懺暨中夕鳴禽戒朗旦備禮寢玄役蕭
索庭賓離飄飄隨風適踟躕歧路隅揮手謝內析輕軒
馳中田習習陵雷擊息心投佯步零零振金策引領望
征人悵恨孤思積吐矣形非我外物固已寂吟詠歸虛
房守真玩幽蹟雖非一往遊且以閒自釋

其三

靖一潛蓬廬惜惜詠初九廣漠排林篠流飈灑隙牖從
容遐想逸採藥登崇阜崎嶇升千尋蕭條臨萬畝望山
樂榮松瞻澤哀素柳解帶長陵陂娑娑清川右冷風解
煩懷寒泉濯溫手寥寥神氣暢欽若盤春數達度冥三
才恍惚喪神偶遊觀同隱丘愧無連化肘

詠懷詩五首

倣兀乘尸素日往復月旋弱喪困風波流浪逐物遷中

路高韻益窈窕欽重玄重玄在何許採真遊理間苟簡
為我養逍遙使我閒寥亮心神瑩含虛映自然靈靈沈
情去彩彩冲懷鮮踟躕觀象物未始見牛全毛鱗有所
貴所貴在忘筌

其二

端坐隣孤影眇罔玄思劬偃蹇收神轡領畧綜名書涉
老怡一作怡雙玄披莊玩太初詠發清風集觸思皆恬愉
俯欣質文蔚仰悲二匠徂蕭蕭柱下迥寂寂蒙邑虛廓

矣千載事消液歸空無矣復何傷萬殊歸一塗道會
貴冥想罔象掇立珠悵快濁水降幾忘映清渠人鑒歸
澄漠容與舍道符心與理理密形與物物疎蕭索人事
去獨與神明居

其三

晞陽熙春圃悠緬歎時往感物思所託蕭條逸韻上尚
想天台峻髣髴巖堦仰冷風灑蘭林管瀨奏清響霄崖
育靈藹神䟽含潤長丹沙映翠瀨芳芝曜五爽迢迢重

岫深寥寥石室朗中有尋化士外身解世網抱樸鎮有
心揮玄拂無想隗隗形崖頽回同神宇敞宛轉元造化
縹緲隣大象願投若人蹤高步振策杖

其四

閑邪託靜室寂寥虛且真逸想流巖阿朦朧望幽人慨
矣玄風濟一作滋皎皎離染純時無問道睡行歌將何因

靈溪無驚浪四嶽無埃塵余將遊其岵解駕輟飛輪芳
泉代甘醴山果兼時珍脩林暢輕跡石宇庇微身崇虛

習本照損無歸昔神曖曖煩情故零零冲氣新近非域
中客遠非世外臣悵怕一作落泊為無德孤哉自有隣

其五

坤基葩簡秀乾光流易韻神理速不疾道會無陵騁超超分

一作介石人握玄攬機領余生一何散分不諮天挺沈無冥到韻

變不揚蔚炳冉冉年往後悠悠化期永翹首希玄津想登故

未正生途雖十三日已造死境願得無身道一作理高棲冲默靖

述懷詩二首

翔鸞鳴崑崙逸志騰冥虛惚恍迴靈翰息肩棲南嶠濯
足戲流瀾採練銜神蔬高吟漱芳醴頽頽登神梧蕭蕭
倚一作椅明翩眇眇育清軀長想玄運夷傾首俟靈符河
清誠可期戢翼令人劬

懸角敦大道弱冠弄雙玄逡巡釋長羅高步尋帝先妙
損階玄老忘懷浪濠川達觀無不可吹累皆自然窮理
增靈蘄昭昭神火傳熙怡安冲漠優游樂靜閒膏腴無
爽味婉孌非雅絃恢心委形度壘壘隨化遷

詠大德詩

遐想存玄哉
沖風一何敞
品物緝榮熙
生塗連惚恍
既喪大澄真
物誘則智蕩
昔聞庖丁子
揮刃在一作仕神往

苟能嗣沖音
攝生猶指掌
乘彼來物間
投此默照朗
邁度推卷舒
忘懷附罔象
交一作大樂盈
胷襟神會流
俯仰

大同羅萬殊
蔚若克甸網
寄旅海漚鄉
委化同天壤

詠禪思道人

并序

孫長樂作道士坐禪之像并而讚之可謂因俯對以

寄誠心來參焉於衡輒圖巖林之絕勢想伊人之在
茲余精其制作美其嘉文不能默已聊著詩一首以
繼於左其詞曰

雲峯竦太荒落落英岳布迴壑佇蘭泉秀嶺攢嘉樹蔚
蒼微遊禽崢嶸絕蹊路中有冲希子端坐摹一作摩太素

自強敏天行弱志慾無欲音喻玉質陵風霜淒淒厲清趣

指心契寒松綢繆諒歲暮會衷兩息間綿綿進禪務投
一滅官知攝二由神遇承蛭纍危九累十亦凝注懸想

元氣地研幾草蘼慮冥懷夷震驚泊然肆幽度曾筌攀
六淨空同浪七住逝虛乘有來永為有待馭

詠利城山居

五嶽盤神基四瀆涌蕩津動求目方智默守標靜仁苟
不宴出處託好有常因尋元存終古洞往想逸民玉潔
其巖下金聲瀨沂濱捲華藏紛霧振褐拂埃塵跡從尺
蠖屈道與騰龍伸峻無單豹伐分非首陽真長嘯歸林
嶺蕭灑任陶鈞

文殊師利讚

童真領玄致靈化實悠長昔為龍種覺今則夢遊方惚
恍乘神浪高步維耶鄉擢此希夷質映彼虛閑堂觸類
興清邁目擊洞兼忘梵釋欽嘉會閑邪納流芳

彌勒讚

大人軌玄度弱喪升虛遷師通資自廢釋迦登幽閑彌
勒承神第聖錄載靈篇乘乾因九五龍飛兜率天法鼓
震玄宮逸轡晃三千晃晃凝素姿結跏趺芳蓮寥朗高

懷興八音暢自然恬智冥微妙縹眇詠重玄盤紆七七
紀應運莅中幡挺此四八姿映蔚華林園疊疊玄輪奏
三攄在昔緣

維摩詰讚

維摩體神性陵化昭機庭無可無不可流浪入形名民
動則我疾人恬我氣平恬動宜形影形影應機情玄韻
乘十哲頡頏傲四英忘期遇濡首疊疊讚死生

善思菩薩讚

玄和吐清氣挺茲命世童登臺發春詠高興希遐蹤乘
虛感靈覺震網發童蒙外見憑寥廓有無自冥同忘高
故不下蕭條數仞中因華請無著陵虛散芙蓉能仁暢
玄句即色自然空空有交映迹冥知無照功神期發鑒
悟豁爾自靈通

月光童子讚

靈童綏神理恬和自交忘弘規愍昏俗統體稱月光心
為兩儀蘊迹為流溺梁英姿秀乾竺名播赤縣鄉神化

說俗網玄羅摯遊方丘巖積陳病長驅幸玉堂汲引興
有待冥歸無盡場戢翼棲高岫凌風振奇芳

廬山東林雜詩

慧遠

崇巖吐清氣幽岫棲神跡希聲奏羣籟響出山溜滴有
客獨冥遊徑然忘所適揮手撫雲門靈關安足闢流一作

留心叩玄扃感至理弗隔孰是騰九霄不奮冲天翮妙

同趣自均一悟超三益

報羅什法師偈

本端竟何從起滅有無際一微涉動境成此積山勢或
相更相乘觸理自生滯因緣雖無主開途非一世時無
悟宗匠誰將握玄契末一作來問尚悠悠相與期暮歲

十喻詩

十首之一

羅什

一喻以喻空空必待此喻借言以會意意盡無會處既
得出長羅住此無所住若能映斯照萬象無來去

贈沙門法和

傳曰凡為十偈辭喻皆爾

心山育明德流薰萬由延哀鸞孤桐上清音徹九天

遊石門詩

并序

廬山諸釋

石門在精舍南十餘里一名障山基連大嶺體絕衆阜闢三泉之會並立而開流傾巖玄映其上蒙形衣於自然故因以為名此雖廬山之一隅實斯地之奇觀皆傳之於舊俗而未覩者衆將由懸瀨險峻人獸迹絕逕迴曲阜路阻行難故罕經焉釋法師以隆安四年仲春之月因詠山水遂杖錫而遊於時交徒同趣三十餘人咸拂衣晨征悵然增興雖林壑幽遠而

開途競進雖乘危履石並以所悅為安既至則援木
尋葛歷險窮崖猿臂相引僅乃造極於是擁勝倚巖
詳觀其下始知七嶺之美蘊竒於此雙闕對峙其前
重巖映帶其後巒阜周迴以為障崇巖四營而開宇
其中則有石臺石池宮館之象觸類之形致可樂也
清泉分流而合注淥淵鏡淨於天池文石發彩煥若
披面檉松芳草蔚然光目其為神麗亦已備矣斯日
也衆情奔悅矚覽無厭遊觀未久而天氣屢變霄霧

塵集則萬象隱形流光迴照則衆山倒影開闔之際
狀有靈焉而不可測也乃其將登則翔禽拂翮鳴猿
厲響歸雲迴駕想羽人之來儀哀聲相和若玄音之
有寄雖髣髴猶聞而神以之暢雖樂不期歡而欣以
永日當其冲豫自得信有味焉而未易言也退而尋
之夫崖谷之間會物無主應不以情而開興引人致
深若此豈不以虛明朗其照閒邃篤其情耶並三復
斯談猶昧然未盡俄而太陽告夕所存已往乃悟幽

人之玄覽達恒物之大情其為神趣豈山水而已哉
於是徘徊崇嶺流目四矚九江如帶丘阜成垤因此
而推形有巨細智亦宜然迺喟然歎宇宙雖遐古今
一契靈鷲邈矣荒途日隔不有哲人風跡誰存應深
悟遠慨焉長懷各欣一遇之同歡感良辰之難再情
發於中遂共詠之云爾

超興非有本理感興自生忽聞石門遊竒唱發幽情褰
裳思雲駕望崖想層城馳步乘長巖不覺質有輕矯首

登靈闕眇若凌太清端坐運虛輪轉彼玄中經神仙同
物化未若兩俱冥

觀化決疑

廬山諸沙彌

謀始創大業問道叩玄篇妙唱發幽蒙觀化悟自然觀
化化已及尋化無間然生皆猶化化化化更相經宛轉
隨化流漂浪入化淵五道化為海孰為知化仙萬化同
歸盡離化化乃玄悲哉化中客焉識化表年

詠懷詩

史宗

有欲苦不足無欲亦無憂
未若清虛者帶索被玄裘
浮遊一世間汎若不繫舟
方當畢塵累棲志老山丘

陵峯採藥觸興為詩

帛道猷

連峯數千里脩林帶平津
雲過遠山翳風至梗荒榛
茆茨隱不見鷄鳴知有人
閒步踐其徑處處見遺薪
始知百代下故有上皇民

答茗華詩

竺僧度

機運無停住倏忽歲時過
巨石曾當竭芥子豈云多
良

由去不息故令川上嗟不聞榮啟期皓首發清歌布衣
可煖身誰論飾綾羅今世雖云樂當奈後生何罪福良
由已寧云已恤他

答僧佉叱

高僧傳云張奴
題槐樹而為歌

張奴

濛濛大象內照曜實顯彰何事迷昏子縱惑自招殃樂
所少人往苦道若翻囊不有松柏志何用擬風霜聞豫

一作
預

紫煙表長歌出昊蒼澄虛無色外應見有緣鄉歲

曜毘漢后辰麗傳殷王伊余非二仙晦迹之九方亦見

流俗子觸眼致酸傷畧謹觀有念寧曰盡矜章

答張奴偈

佉叱

悠悠世事惑滋損益使欲塵神橫生悅懌惟此哲人淵
覺先見思形浮沫矚影遍電累躋聲華茂醜章弁視色
悟空翫物傷變捨紛絕有斷習除癡青條曲蔭白茅以
薦依畦吸麻隣岸飲渚慧定計昭妙真曰眷慈悲有增
深想無倦

淨土詠

無名釋

金繩界寶地珍木蔭瑤池雲間妙音奏天際法蟲吹

宋詩

怨詩行

慧休
十一首

明月照高樓含君千里光
蒼中情思滿斷絕孤妾腸
悲風盪帷帳瑤翠坐自傷
妾心依天末思與浮雲長
嘯歌視秋草幽葉豈再陽
暮蘭不待歲離華能幾芳
願作張女引流悲繞君堂
君堂嚴且祕絕調徒飛揚

江南思

幽客海陰路留戍淮陽津垂情向春草知是故鄉人

楊花曲

歲華結實宛轉風含思掩涕守春心折蘭還自遺江
南相思引多歎不成音黃鶴西北去銜我千里心深堤
下生草高城上入雲春人心生思思心長為君

白紵歌二首

琴瑟未調心已悲任羅勝綺彊自持忍思一舞望所思
將轉未轉恒如疑桃花水上春風出舞袖逶迤鸞照日

徘徊鶴轉情豔逸君為迎歌心如一

少年窈窕舞君前容華豔豔將欲然為君嬌凝復遷延
流目送笑不敢言長袖拂面心自煎願君流光及盛年

秋風

一作秋歌

秋風嫋嫋入曲房羅帳含月心思傷蟋蟀夜鳴斷人腸
長夜思君心飛揚他人相思君相忘錦衾瑤席為誰芳

一作徒
為芳

秋思引

秋寒依依風過河白露蕭蕭洞庭波思君末光光已滅
耿耿悲望如思何

楚明妃曲

瓊臺彩楹桂寢雕甍金閨流耀玉牖含英香芬幽靄珠
彩珍榮文羅秋翠紈綺春輕驂駕鸞鶴往來仙靈含姿
綿視微笑相迎結蘭枝送目成當年為君榮

贈鮑侍郎

玳枝兮金英綠葉兮紫莖不入君玉杯低彩還自榮想

君不相豔酒上視塵生當令芳意重無使盛年傾

悼武丘法網法師

慧琳

懷遊君之虎丘悼冥滅之廬嶺惟採錄於中京念提攜
於番境情飄飄於雙螭思纏綿於兩省何綢繆兮無極
心所存兮膈臆閱嚴冬兮已謝藉隆暑兮既息四運紛
其遄迴情期宵以長匿苟求緣之匪亡卷生年以增惻
齊詩

估客樂

寶月

齊武帝布衣時同寶月遊樊鄧及登祚
追憶往事命月作此四章奏之管絃

郎作十里行儂作九里送拔儂頭上釵與郎資路用

其二

有信數寄書無信心相憶莫作瓶落井一去無消息

其三

大舩珂我頭何處發揚州借問舩上郎見儂所歡不

其四

初發揚州時船出平津泊五兩如竹林何處相尋博

行路難

君不見孤雁關外發
酸嘶度揚越
空城客子心腸斷
幽閨思婦氣欲絕
凝霜夜下拂羅衣
浮雲中斷開明月
夜遙遙徒相思
年年望望情不歇
寄我匣中青銅鏡
倩人為君除白髮
行路難行路難
夜聞南城漢使度
使我流淚憶長安

梁詩

識詩

寶誌

隋書云梁武帝與誌公坐重雲殿公忽起舞歌樂頌史悲泣賦此云云自天監至大同三十餘年江表晏然至太清二年臺城陷帝享國四十八年所言五十裏也太清元年八月十三而侯景自懸瓠來降在丹陽之北子地也景作亂始自戊辰歲至午年帝崩

樂哉三十餘悲哉五十裏但看八十三子地妖災起佞臣作欺妄賊臣滅君子若不信吾言龍時侯賊起且至馬中間銜悲不見喜

識詩

周廣順中江南伏龜山圮得白石函二八廣八寸中有銘云維天監十四年秋八月寶公埋於

此山當時名臣陸倕王筠姚合而下皆莫曉其義問之曰在五百年後方應詞曰

若問江南事江南自有憑

識石虎李煜事

乘鷄登寶位

以丁酉年李氏

有國也

犬吠入金陵

宋開寶七年甲戌伐江南也八年國滅

子建司南斗安

仁秉夜燈

當王師圍城其南曹彬其北潘美也

東隣家道闕隨虎遇明君

太平興國三年戊寅吳越錢弘俶舉國入朝家道闕無錢也

奉和武帝三教詩

智藏

心源本無二學理共歸真四執迷叢藥六味增苦辛資緣良雜品習性不同循至覺隨物化一道開異津大士

流權濟訓義乃星陳周孔尚忠孝立行肇君親老氏貴
裁欲存生由外身出言千里善芬為窮世珍理空非即
有三明似未臻近識封岐路分鑣疑異塵安知悟云漸
究極本同倫我皇體斯會妙鑒出機神眷言總歸轡迴
照引生民顧惟慙宿植邂逅逢嘉辰願陪入明解歲暮
有攸因

和受戒詩

庾肩吾有和太子
重雲殿受戒詩

慧令

泐寥秋氣爽搖落寒林疎風散飛廉雀浪動昆明魚是

日何為盛證戒奉皇儲願陪升自在神通任卷舒

犯虜將逃作

慧慕

從周入齊夜渡砥柱見梁詞
人麗句文苑英華作顏之推

客子倦艱辛夜出小平津馬色迷關吏鷄鳴起戍人露
鮮花斂影月照寶刀新問我將何去北海就孫賓

詠獨杵擣衣

慧侶

非是無人助意欲自鳴砧照月斂

一作憐

孤影乘風送迥

音言擣雙絲練似奏一絃琴令君聞獨杵知妾有專心

聞侯方兒來寇

羊皮贖去士馬草歛還尸天下方無事孝廉非哭時

弔范賁

慧約

我有數行淚不落十餘年今日為君盡併灑秋風前

三洲歌二首

法雲

三洲斷江口水從窈窕河傍流啼將別共來長相思

其二

三洲斷江口水從窈窕河傍流歡將樂共來長相思

陳詩

詠山

慧標八首

靈山蘊麗名秀出寫蓬瀛香爐帶煙上紫蓋入霞生霧捲蓮峯碧宮開石鏡明定知丘壑裏併佇白雲情

其二

峨眉信重險天目本仙居金華抱丹竈玉笥蘊神書幽人披薜荔怨妾採靡藍紫巖無暮雨何時逢故夫

其三

丹霞拂層閣碧水泛蓬萊
鰲岫含煙聳蓮崖照日開
松門夾細葉石磴染新苔
能令平子見淹留未肯回

詠水

驪泉紫闕映珠浦碧沙連
岸隔蓮香遠流清雲影深
風潭如拂鏡山溜似調琴
請君看皎潔知有澹然心

其二

長川落日照深浦漾清風
弱柳垂江翠新蓮夾岸紅
船行疑泛迥月映似沈空
願逐琴高戲乘魚入浪中

其三

曾添疎勒井經通貳師營
玉津花色亮銀溪錦積明舟
如空裏汎人似鏡中行
持符上善利物動高情

詠孤石

中原一孤石地理不知年
根含彭澤浪頂入香爐煙崖
成二鳥翼峯作一莖蓮
何時發東武今來鎮蠡川

贈陳寶應

送馬猶臨水離旌稍引風
好看今夜月當照紫微宮

和偃法師遊故苑

曇瑗

丹陽松葉少白水黍苗多浸淫下客淚哀怨動民歌春
溪度短葛秋浦沒長莎麋鹿自騰倚車騎絕經過蕭條
四野望惆悵將如何

遊故苑

洪偃 三首

龍田留故苑汾水結餘波悵望傷遊目辛酸思緒多涼
颼慘高樹濃露變輕蘿澤葵猶帶荇池竹尚一作侵荷
秋風徒自急無復白雲歌

登吳昇平亭

蕭蕭物候晚肅肅天望清旅人聊策杖登高蕩客情川
原多舊迹墟里或新名宿煙浮始旦朝日照初晴獨遊
乏徒侶徐步寡逢迎信矣非吾託賞心何易并

遊鍾山之開善定林息心宴坐引筆賦詩

杖策步前嶺褰裳出外扉輕蘿轉蒙密幽徑復紆威樹

高枝影細山盡

一作盡

鳥聲稀石苔時滑屐蟲網乍粘衣

澗傍紫芝曄巖上白雲霏松子排煙去堂生寂不歸窮

谷無還往攀桂獨依依

臨終詩

智愷

千月

一作秋

本難滿三時理易傾石火無恒燄電光非久

明遺文空滿筭徒然昧無

一作復

生泉路方幽晷寒隴向

淒清一隨朝露盡惟有夜松聲

詠孤石

定法師

迥日直生空平湖四望通巖隈恒灑浪樹杪鎮搖風偃
流還漬影侵霞更上紅獨拔羣峯外孤秀白雲中

金剛經
卷一
北周詩

五苦詩

法師七首

生苦

可患身為患生將憂共生心神恒獨苦寵辱橫相驚朝
光非久照夜燭幾時明終成一聚土強覓千年名

老苦

少時欣日益老至苦年侵紅顏既罷豔白髮寧久吟階
庭唯仰杖朝府不勝簪甘肥與妖麗徒有壯時心

病苦

拔劍平四海橫戈却萬夫一朝床枕上迴轉仰人扶壯
色隨肌減呻吟與痛俱綺羅雖滿目愁眉獨向隅

死苦

可憐凌雲志忽隨朝露終長辭白日下獨入黃泉中池
臺既已沒墳隴向應空唯當松柏裏千年恒勁風

愛離

誰忍心中愛分為別後思幾時相握手嗚噎不能辭雖

言萬里隔猶有望還期如何九泉下更無相見時

五盛陰

佛書有五陰之喻謂以聚沫喻色水泡喻受陽燄喻想芭蕉喻行幻事喻識言皆空虛也

先去非長別後來非久親新墳將舊塚相次似魚鱗茂陵誰辨漢驪山詎識秦千年如昨日一種併成塵定知今世土還是昔時人焉能取他骨復持埋我身

過徐君墓

延陵上國返枉道訪徐公死生命忽異歡娛意不同始

往邛山北聊踐平陵東徒解千金劍終恨九泉空日盡
荒郊外煙生松栢中何言愁寂寞日暮白楊風

飲馬長城窟

法師

長城征馬度橫行且勞羣入冰穿凍水飲浪聚流文澄
鞍如漬月照影若流雲別有長松氣自解遂將軍

隋詩

愛妾換馬

法宣

朱鬣飾金鑣紅粧束素腰似雲來蹀躞如雪去飄飄桃

金少卿詩集卷一
花含淺汗柳葉帶餘嬌
騁先將獨立雙絕不俱標

和趙郡王觀妓應教

桂山留上客蘭室命妖嬈
城中畫眉黛宮內束纖腰
舞袖風前舉歌聲扇後驕
周郎不相顧今日管絃調

遊三學山

智炫

秀嶺接重煙巖岑上半天
絕巖低更舉危峯斷復連
側石傾斜澗回流瀉曲泉
野紅知草凍春來鳥自傳
樹錦無機織猿鳴詎假絃
葉密風難度枝疎影易穿
抱衮依

閒沼策杖戲荒田遊心清漢表置想白雲邊榮名非我
願息意且蕭然

緇素祖道新林感賦

曇遷

平生本胡越閩吳各異津聯翩一傾蓋便作法城親清
談解煩累愁眉始得伸今朝忽分手恨失眼中人子向
徑何道慧業日當新我住邗江側終為松下塵沉浮從
此隔無復更有因此別終天別迸淚忽霑巾

言離廣府還望桂林去留愴然自述贈懷

玄達 三首

標心之梵宇運想入仙洲
嬰痼乖同好沈情阻若抽
葉落乍難聚情離不可收
何日乘杯至詳觀演法流

戲擬四愁耶題兩絕

我行之數萬愁緒百重思
那教六尺影獨步五天陲
其二

上將可陵師匹士志難移
如論惜短命何得滿長祗

哀速終

靈裕

今日坐高堂明朝卧長棘一生聊已竟來報將何息

悲永殯

命斷辭人路骸送鬼門前從今一別後更會幾何年

臨終詩

智命

幻生還幻滅大幻莫過身安心自有處求人無有人

送別

智才

鏡中辭舊識潮岸別新知年來本應老祇為數經離

薛道衡見訪戲題方圓動靜四字 曇延

方如方等城圓如智慧日動則識波浪靜類涅槃室

順益頌

無名釋

騷騷資鞭策蘭蕙佇薰風至理信難見非人孰可通輸
心仰圓極瑩麗入玄中總轡超三有搏飛上四空簪纓
猶幻夢財利若塵蒙高揖謝時俗瀟灑出樊籠

媼佚曲

作此曲彈琴
以兆史見也

沸火 二首

煌煌鬱金生於野田過時不採究見棄捐曼爾豈熾華
色惟新與我同歡

委靡辭

宿心嘉爾故固良媒問名諧帥占相良時慘慘惕懼
爾不來既覩爾顏我心怡怡今不合歡豈徒費哉斯誓
為定淑女何疑

一三五七九言

慧英

遊愁赤縣遠丹思抽鷺嶺寒風駛龍河激水流既喜朝
聞日復日不覺年頽秋更秋已畢耆山本願誠難住終
望持經振錫往神州

附讚銘誄賦

釋迦文佛像讚

并叙

文遁

夫立人之道曰仁與義然則仁義有本道德之謂也
昔姬周之末有大聖號佛天竺釋王白淨之太子也
俗氏母族厥姓裴曇焉仰靈胄以丕承藉儒哲之遺
芳吸中和之誕化稟白淨之顯然生自右脅弱而能
言諒天爵以不加為貴誠逸祿以靡須為足故常夕
惕上位逆旅紫庭紆軫儲宮擬翮區外俄而高逝周

覽郊野四闢皇扉三鑒疾苦風人厲辭以激興乃甘心受而莫逆訊大猷於有道慨在茲之致淹遂乃明發遐征棲遲幽閒脫皇儲之重任希無待以輕舉褫龍章之盛飾貿窮巖之褊褐資送之儔自崖而反矣爾乃抗志匪石安仁以山斑卉匡居推心立盟釐安般之氣緒運十算以質心併四籌之八記從二隨而簡巡絕送迎之兩際緣妙一於鼻端發三止之矇秀洞四觀而合泯五陰遷於還府六情虛於靜林涼五

內之欲火廓太素之浩心濯般若以進德潛七住而
挹玄搜冥魚於六絕齒既立而廢筌露萬劫之積習
同生知於當年掩五濁以擅曜嗣六佛而徵傳偉唯
丈六體佩圓光啟度黃中色豔紫金運動陵虛悠往
倏忽八音流芳逸豫揚彩沙覽未兆則卓絕六位曲
成已著則化隆三五冲量弘乎太虛神蓋宏於兩儀
易簡待以成體太和擬而稱劬圓著者象其神寂方
卦者法其智周照積祐之留祥元宿命以制作或綱

之以德義或疎之以冲風亮形搖於日新期妙主於
不盡美既青而勝藍逞百練以就粹導庶物以歸宗
拔堯孔之外鍵屬八億以語極覃墳索以興典撥道
行之三無絡聃周以曾玄神化著於西域若朝暉升
於暘谷民望景而興行猶曲調諧於宮商當是時也
希夷緬邈於義風神竒卓絕於皇軒蔚彩冲漠於周
唐頌味有餘於鄒魯信可謂神化之都領皇王之宗
謨也年逾從心泯迹泥洹夫至人時行而時止或隱

此而顯彼迹絕於忍土冥歸於維衛俗徇常以駭奇
固以存亡而統之至於靈覺之性三界殄悴豁若川
傾頽如乾墜黔首與永夜同幽冥流與涸津並匱六
度與崩岑俱褫三乘與絕軸解轡門徒泣血而心喪
百靈銜哀而情慄夫道高者應卑因巡者親譽故不
祈哭而哭豈非兼忘天下易使天下兼忘難靈風播
越環周六合歷數終於赤縣後死所以與聞景仰神
儀而事絕於千載祇洹既已漂落玉樹卒亦荒蕪道

喪人亡時亦已矣遁以不才仰遵大猷追朝陽而弗
暨附桑榆而未升神馳在昔願言再欽遂援筆興古
述厥遐思其詞曰

太上邈矣有唐統天孔亦因周遽廬三傳明明釋迦實
惟帝先應期獻作化融竺乾交養恬和濯粹沖源邁軌
世王領宗中玄堂構洪謨揭秀負靈峻誕崑岳量夏太
清太象罕窺乃圓其明玄音希和文以八聲煌煌慧炬
燭我宵征人欽其哲孰識其冥望之霞舉即亦雲津威

揚夏烈溫柔晞春比麗以形卓機以神卷即烟滅騰亦
龍伸鼓舞舟壑靈氣惟新誰與茲作獨運陶鈞三無衷
玄八億致遠二部既弘雙翰惟典充以環竒恬以易簡
藏諸蘊匱實之令善可善善因乃讚乃演致存言性豈
伊弘闡日月貞朗顯晦周徧生如紛霧暖來已晞至人
全化跡隨世微假云泥洹言告言歸遺風六合佇方赤
畿象罔不存誰與悟機鏡心乘翰庶覲冥暉

阿彌陀佛像讚并序

夫六合之外非典籍所模神道詭世宜意者所測故
曰人之所知不若其所不知每在常輒欲以所不能
見而斷所未能了故令井蛙有坎宅之矜馮夷有秋
水之伐故其冥矣余遊大方心倦無垠因以靜暇復
伸諸奇麗佛經記西方有國國名安養迥遼迴邈路
踰恒沙非無待者不能遊其疆非不疾者焉能致其
速其佛號阿彌陀晉言無量壽國無王制班爵之序
以佛為君三乘為教男女各化育于蓮華之中無有

胎孕之穢也館宇宮殿悉以七寶皆自然懸構制非
人匠苑囿池沼蔚有奇榮飛沈天逸於淵數逝寓羣
獸而率真閭闔無扇於瓊林玉響天諧於簫管冥霄
隕華以闔境神風拂故而納新甘露徵化以醴被蕙
風導德而芳流聖音應感而雷響慧澤雲垂而沛清
學文喻今而貴言真人冥宗而廢翫五度憑虛以入
無般若遷知而出玄衆妙於茲大啟神化所以永傳
別有經記以錄其懿云此晉邦五末之世有奉佛正

戒諷誦阿彌陀經誓生彼國不替誠心者命終靈逝
化往之彼見佛神悟即得道矣遁生末蹤泰廟殘跡
馳心神國非所敢望乃因匠人圖立神表仰瞻高儀
以質所天詠言不足遂復係以微頌其詞曰

王猷外釐神道內綏皇矣正覺實兼宗師泰定軫曜黃
中秀姿恬智交泯三達玄夷啟境金方緬路悠迴于彼
神化悟感應機五度砥操六慧研微空有同狀玄門洞
開詠歌濟濟精義順神玄肆洋洋三乘說說藏往舉故

知來惟新二才孰降朗滯由人造化營域雲構我我紫
館辰峙華宇星羅玉闌通方金墉啟阿景傾朝日豔蔚
晨霞神提迴互九源曾深浪無筌忘鱗罕餌淫澤不司
虞駭翼懷林有客驅徒雨埋機心甘露敦洽蘭蕙助馨
化隨雲濃俗與風清歲藥消散靈飈掃英瓊林諧響八
音文成珉瑤沈粲芙蓉晞陽流澄其潔藥播其香潛爽
冥萃載哲來翔孕景中葩結靈幽芳類諸風化妙兼于
長邁軌一變同規坐忘

萬佛影銘

并序

慧遠

佛昔化毒龍所留之影在月氏國石室中去此
萬六千里遠師每欣感交懷志欲瞻禮會有西
域道士叙其光相圖寫儀像於東林寺色疑積
空望似煙霞暉相炳燁若隱而顯感世之應詳
於記也

夫滯於近習不達希世之聞撫常永日罕懷事外之
感是使塵想制於玄襟天羅網其神慮若以之窮齡
則此生豈遇以之希心則開悟靡期於是發憤忘食
情百其慨靜慮閑夜理契其心爾乃恩沾九澤之惠

三復無緣之慈妙尋法身之應以神不言之化化不以方唯其所感慈不以緣冥懷自得譬日月麗天光影彌暉羣品熙榮有情同順咸欣懸映之在已罔識曲成之攸奇妙物之談功盡於此將欲擬夫幽極以言其道髣髴存焉而不可論何以明之法身之運物也不物物而非其端不圖終而會其成理玄於萬化之表數絕乎無形無名者也若乃語其筌寄則道無不在是故如來或晦先跡以崇基或顯生塗而定體

或獨發於莫尋之境或相待於既有之場獨發類乎
形相待類乎影推夫冥寄為有待耶為無待耶自我
而觀則有間於無間矣求之法身原無二統形影之
分孰際之哉而今之聞道者咸摹聖體於曠代之外
不悟靈應之在茲徒知圓化之非形而動止方其跡
豈不誣哉遠昔尋先師奉侍歷載雖啟蒙慈訓託志
玄籍每想竒聞以篤其誠遇西域沙門輒餐遊方之
說故知有佛影而傳者尚未曉然及在此山值夙賓

禪師南國律學道士與昔聞既同並是其人遊歷所
經因其詳問乃多有先徵然後驗神道無方觸像而
寄百慮所會非一時之感於是悟徹其誠應深其信
將援同契發其真趣故與夫隨喜之賢圖而銘焉

廓矣大像理玄無名體神入化落影離形迴暉層巖凝
映虛亭在陰不昧處暗愈明婉步蟬蛻朝宗百靈應不
同方跡絕兩冥

茫茫荒宇靡勸靡獎談虛寫容拂空傳像相具體微沖

姿自朗白毫吐曜昏夜中爽感徹乃應扣誠發響留音
停岫津悟冥賞撫之有會功弗由囊

旋踵忘敬罔慮罔識三光掩暉萬象一色庭宇幽藹歸
塗莫測悟之以靜震之以力慧風雖遐維塵攸息匪伊
玄覽孰扇其極

希音遠流乃眷東顧欣風慕道仰規玄度妙盡毫端運
微輕素託彩虛凝殆映霄霧迹以像真理深其趣奇興
開襟祥風引路清氣迴於軒宇昏明交而未曙髣髴鏡

金匱要略卷一
神儀依稀若真遇

銘之圖之曷營曷求神之聽之鑒爾所修庶茲臣軌映
彼玄流漱情靈沼飲和至柔照虛應簡智落乃周深懷
冥託霄想神遊畢命一對長謝百憂

晉襄陽太六金像頌

并序

昔衆祐降靈出自天竺託化王宮興於上國顯迹重
冥開闢神路明暉宇宙光宅大千萬流澄源圓映無
主覺道虛凝湛焉遺照於是乘變化以動物而衆邪

草心跬神步以感時而羣疑同釋法輪玄運三乘並
轍道世交興天人攸夢淨音既暢逸響遠流密風遐
扇遠生善教末年垂千祀徒欣大化而運乖其會弗
獲叩津沙門發明淵極魍魎神影餐服至言雖欣味
餘塵道風遂邁擬足逸步玄迹已邈每希想光晷髣
髴容儀寤寐興懷若形心目冥應有期幽情莫發慨
焉自悼悲憤靡寄乃遠契百念慎敬慕之思追述八
王同志之感魂交寢夢而情悟於中遂命門人鑄而

像焉夫形理雖殊階塗有漸精麤誠異悟亦有因是
故擬狀靈範啟殊津之心儀形神模闢百慮之會使
懷遠者兆立根於來葉存近者邁重劫之厚緣乃道
福兼弘真跡可踐三源反流九神同淵於時四輩悅
情道俗齊趣跡響和應者如林鑄均有虛室之供而
進助者不以纖毫為挫勸佐有彌劫之勤而操務者
不以昏疲告勞因物任能不日而成功自人事猶天
匠焉夫明志莫如詞宣德莫如頌故志以詞顯而功

業可存德以頌宣而形容可像匪詞匪頌將何美焉
乃作頌曰

堂堂天師明明遠度淩邁羣萃超然先悟慧在恬虛妙
不以數感時而興應世成務金顏映發奇相暉布肅肅
靈儀峨峨神步茫茫造物玄運冥馳偉哉釋迦與化推
移靜也淵默動也天隨綿綿遠御疊疊長縻反宗無像
光潛影離仰慕千載是擬是儀

法師支曇諦誄

并序

道護

晉義熙七年五月某日道士支曇諦卒春秋六十有五嗚呼哀哉法師肇脩西域本出康居因族以國氏既服膺師訓乃從法姓支徙於吳興郡烏程縣都鄉千秋里資金商之貞氣藉陽育之韶律胄遐方而誕秀協川嶽而稟神識情湛粹風宇明肅道致表於天期德範彰於素器貞悟獨拔羣異不足以動其心至誠深固衆論莫能以干其執是以超塵絕詣慧旨發於弱齡研欲耽玄明道昭於歲暮故能振靈風於神

境演妙化於季葉嗣清徽於前哲穆道俗而歸懷焉
遊涉衆方敷揚大業妙尋幽蹟清言析微加善屬大
辭識實參流固已諧契風勝領冠一時矣公之中年
爰乃慨以城傍難置幽居為節且山水之性素好自
然淨外之默體自天心於是謝緣人封遁迹巖壑乃
考室於吳興郡故鄣之崑山味道崇化二十餘載其
棲業所弘可以洗心滌垢筌象之美足以窮興永年
於是晞宗歸仁者自羣方而集欽風懷趣者不遠而

叩津焉于時時望英豪多延請齋講公虛心應物不
嘗以動止介懷推誠述義未始以道俗殊致其中抱
一之德入遐爾所推方將灑拂玄路絙維頽風超外
妙梯擬徹玄蹤惜乎不永遺疾而終識者深云亡之
痛攸情感惟良之悲蓋無爵而貴生榮死哀者其此
之謂矣雖至理冥一存亡定於形初玄識妙照骸麗
同於朽壤然而闕情期於成感之境未泯乎離會之
心者亦何能不以失得為悲喜臨長岐而悽懷哉苟

冥廢之難體寄筌翰以懷風援弱毫而舒情播清暉
乎無窮乃作誄曰

綿綿終古曖曖玄路妙緣莫叩長寐靡寤生滅紛紜動
息舛互相驅百世季葉彌靈水濁塵勞孰知其故至人
乘運靈覺中肇未覩滄流并龜無小大明融朗幽夜乃
曉滅有歸空除闇即暎道洽無方仁被禽鳥昧者靡遺
識者彌了其超哉法師道性自然一心絕俗祇誠重玄
研微神鋒妙悟無間塵之所著在至斯捐累之所引秉

之彌堅擺落塵羈振抱靈淵

其二

遼遼清雅肅肅貞韻汪

汪其冲疊疊其進和而有概異而不峻淳心獨得標想

千仞虛以應物無來不順

其三

汎遊弘化振響揚暉開道

玄肆肇闢靈扉位制冥極剖折幽微忘懷善挹穆然靡

違會通羣方總之所歸遐抗顏綱闡固法聞緒此妙慧

乃播神威

其四

幽境湛默人肆諠引問遽易一華紛難泯

公乃慨然中駕潛軫卜居川巖構室林巘擯拭外緣潛

精內敏靡筌不服無微不盡

其五

蔚美崑嶺固阜丘墟連

峯雲秀迴壑迂餘庭蔭蕭條階繞清渠翳然其遠肅爾
其虛眇眇玄風愔愔僧徒味道閒室寂焉神居心隨道
親情與俗疎其道固無孤德必有隣淵清引映業勝懷
人晞風宗玄自遠來賓亦有襟期時來問津湛湛先窮
日日王神林壤有謝道心常新其聖逝言絕賢表義乖
翳翳末運玄化將頽澹矣夫子道俗歸懷庶享遐年振
此落維如何不弔棄世永辭儀景長歸逝矣不追有識
深慟含情同悲嗚呼哀哉其推著綢繆聚淹信宿閒宴

清宇藉卉幽谷或濯素瀨爰憇翠竹屢興名辰汎觴掇
菊梨柚薦甘蒲筍為菽賦詩詠言怡然偕足眷懷茲遊
想之在目傷哉斯遇千載無復踐舊霑襟瞻幃悲哭嗚
呼哀哉九其有必之無始則歸卒達人妙觀千齡一日昧
者或應橫為凶吉邈矣法師夙反玄室累劫之勤不速
而疾庶遣冥緣終會靈術妙斤弗運實深喪質情在未
冥悵為自失寄懷毫素微風載迷嗚呼哀哉十其

鳩摩羅什法師誄

并序

僧肇

夫道不自弘弘必由人俗不自覺覺必待匠待匠故
世有高悟之期由人故道有小成之運運在小成則
靈津輟流期在高悟則玄鋒可詣然能仁曠世期將
千載時師邪心是非競起故使靈規潛逝徽緒殆亂
爰有什法師者蓋先覺之遺嗣也凝思大方馳懷高
觀審釋道之陵遲悼蒼生之窮藹故乃奮迅神儀寓
形季俗繼承洪緒為時城塹世之安寢則覺以大音
時將晝昏乃朗以慧日思結頽綱於道消緝落緒於

窮運故乘時以會錯枉以正一扣則時無互鄉再擊則畏壘歸仁於斯時也羊鹿之駕摧輪六師之車覆轍二想之玄既明一乘之奧亦顯是以端坐嶺東響馳八極恬愉弘訓而九流思順故大秦符姚二大王師旅以延之斯仁王也心遊大覺之門形鎮萬化之上外揚羲和之風內盛弘法之術道契神交屈為形授公以宗匠不重則其道不尊故蘊懷神寶感而後動自公形應秦川若燭龍之曜神光恢廓太宗若曦

和之出溥桑融治常道盡重玄之妙閒邪悟俗窮名
教之美言既適時理有圓會故辯不徒興道不虛唱
斯乃法鼓重震於閻浮梵輪再轉於天北矣自非位
超修成體精百練行藏應時其孰契於茲乎以要言
之其為弘也隆於春陽其除患也厲於秋霜故巍巍
乎蕩蕩乎無變之高韻然隘運幽興若人云暮癸丑
之年年七十四月十三日薨乎大寺嗚呼哀哉道匠
西傾靈軸東推朝曦落曜寶岳崩頽六合晝昏迷駕

九迴神關重閉三途競開夜光可惜盲子可哀罔極之感人百其懷乃為誄曰

先覺登霞靈風緬邈通仙潛凝應真沖漠叢叢九流是非競作悠悠盲子神根沈溺時無指南誰識冥度大人遠覺幽懷獨悟恬恬沖靜然抱此玄素應期乘運翔翼天路既曰應運宜當時望受生乘利形標奇相襁褓俊遠髻鬣逸量思不再經悟不待匠授足八道遊神三向玄根挺秀宏音遠唱又以抗節忽棄榮俗從容道門尊尚

素朴有典斯尋有妙斯錄弘無自替宗無擬族霜結如
冰神安如岳外跡彌高內朗彌足恢恢高韻可模可因
惛惛冲懷惟妙惟真靜以通玄動以應人言為世寶默
為時珍華風既立二教亦賓誰謂道消玄化方新自公
之覺道無不弘靈風遐扇逸響高騰廓茲大方然斯慧
燈道音始唱俗網以崩癡根彌拔上善彌增人之寓俗
其途無方統斯羣有紐茲頽綱順以四恩降以慧霜如
彼維摩迹參城方形雖圓應神冲帝鄉來教雖妙何足

以臧偉哉大人振降圓德標此名相顯彼冲默通以衆
妙約以玄則方隆般若以應天北如何運邇幽里冥剋
天路誰通三途誰塞嗚呼哀哉至人無為而無不為擁
網遐籠長羅遠羈純恩下鈞客旅上擒恂恂善誘肅肅
風馳道能易俗化能時移奈何昊天摧此靈規至真既
往一道莫施天人哀泣悲慟靈祇嗚呼哀哉公之云亡
時唯百六道匠輻斤梵輪推軸朝陽頽景瓊岳顛覆宇
宙晝昏時喪道目哀哀蒼生誰撫誰育普天悲感我增

摧衄嗚呼哀哉昔吾一時曾遊仁川遵其餘波纂承虛
玄用之無窮鑽之彌堅躍日絕塵思加數年微情未叙
已隨化遷如可贖兮買之以千時無可待命無可延惟
身惟人靡憑靡緣馳懷罔極情悲昊天嗚呼哀哉

道慶法師銘詞

并序

法宣

余與伊人言忘道狎京輦少年已欣共被他鄉衰暮
更喜同袍月席風筵接腕晤語吾子經堂論室促膝
非異人豈意玄窮殲我良友千行徒洒百身寧贖未

能抑筆耶書短銘

十力潛景四依匡世踵德連暉伊人是繼宮牆戒忍燈
炬禪慧並驅生林分庭安獻論堂撫玉義室芬蘭坐威
師子衆繞梅檀道潔塵外理析談端四儀式序三業惟
安穢土機窮勝人現滅帳留餘影車迴去轍隴月孤照
墳泉幽冽竹露暫團松風長切氣運有終德音無絕

擬周廟金人銘

名息心銘

亡名釋

法界內有如意寶人焉久緘其口銘其膺曰古之攝心

人也誠之哉誠之哉無多慮無多知多知多事不如息
意多慮多失不如守一慮多志散知多心亂心亂生惱
志散妨道勿謂何傷其苦悠長勿言何畏其禍鼎沸滴
水不停四海將盈纖塵不拂五嶽將成防末在本雖小
不輕關爾七竅閉爾六情莫視於色莫聽於聲聞聲者
聾見色者盲一文一藝空中小蚋一伎一能日下孤燈
英賢才藝是為愚弊捨棄浮樸耽溺淫麗識馬易奔心
猿難制神既勞役形必損斃邪徑終迷脩途永泥莫貴

才能是曰惜情誇拙羨巧其德不弘名厚行薄其高遠

崩徒一作塗舒翰卷其用不恒內懷憍伐外致怨憎或談

於口或書於手邀人令譽亦孔之醜凡謂之吉聖以之

咎賞悅暫時悲憂長久畏影畏迹逾走逾劇端坐樹陰

迹滅影沉厭生患老隨思隨造心想若滅長死長絕不

死不生無相無名一道虛寂萬物齊平何勝何劣何重

何輕何賤何辱何貴何榮澄天愧淨皎日慙明安夫岱

嶺固彼金城敬貽賢哲斯道利貞

思親鑿井銘

慧斌

哀哀父母載生載育亦既弄璋我顧我復一朝棄予山
川滿目雲掩重關風驚大谷愛敬之道天倫在茲殷憂
暮齒見子無期鑿井通給託事興詞百年幾日對此長
悲玉檢之南嶧陽之北獲麟之野秉禮之國居有美政
俗多儒墨玉井洞開高碑斯勒

三不為篇

海順

我欲偃文修武身死名存研石通道祈井流泉君肝在

內我身處邊荆軻拔劍毛遂捧盤不為則己為則不然
將恐兩虎共鬪勢不俱全永存今好長絕來怨是以返
跡荒逕息影柴門

我欲刺股錐刀懸頭屋梁書臨雪彩牒映螢光一朝鵬
舉萬里驚翔縱任身辯遊說君王高車返邑衣錦還鄉
將恐鳥殘以羽蘭折由芳籠餐詎貴鈎餌難嘗是以高
巢林藪深穴池塘

我欲銜才鬻德入市趨朝四衆瞻仰三槐附交標形引

勢身達名超箱盈綺服厨富甘肴諷揚絃管詠美歌謠
將恐塵棲弱草霜宿危條無過日旦靡越風朝是以還
傷樂淺非惟苦遠

詳玄賦

慧命

惟一實之淵曠嗟萬相之繁雜真俗異而體周凡聖分
而道合承師友之遺訓藉經論之垂芳聲塵庸之小識
請興言於大方何羣類之蠢蠢處法界之茫茫性窮幽
而彌曉理至寂而逾彰既非空而非有又若存而若亡

談祕密於慈氏歎杳冥於伯陽湛一虛而致極總萬有
以為綱雖即事而易迷亦至近而難識非名言之所顯
宣情智而能測口欲辯而詞喪心將緣而慮息故雖一
音隨類之能三轉任機之力莫不停入正於寂泊之門
輟四辯於恬淡之域尋其體也密乎無際眇乎無窮源
乎無始極乎無終解惑以茲齊貫染淨於此俱融該空
有而閱寂括宇宙以通同論其用也一而能多靜而能
亂挺萬類之殊形吐羣情之別觀結五住之盤根起十

纏之羈絆隨迷悟而通塞逐昏明而集散四流因之漂
蕩六道以之悠漫三賢十聖暖以聯綿二智五眼曄而
輝煥渾升沈而共壑派違順以分岐體無非而不是用
無相而不為若純金不隔於鑲釧等積水不憚於漣漪
故令名用諱雜集起紛馳事若萬軫殊轍理則千輪共
規觀無礙於緣起信難思於物性猶寶殿之垂珠若瑤
臺之懸鏡彼此異而相入紅紫分而交映法無定於心
境人靡隔於凡聖物不滯於自他事莫擁於邪正何巨

細之殊越遂參互而容持隣虛舍大千之界剎那總三
際之時懼斯言之少信借帝網以除疑蓋普眼而能矚
豈惑識以知之覲九會之玄文覽萬聖之遺則瞻常啼
於東市慕善財於南國歷多城而進解訪衆師而遣惑
始承命於丈殊終歸宗於妙德雖遊形於法界未動足
於祇園歎一王之似虐嗟五熱之非暄握手入和修之
舍彈指開阿逸之門聞一音之常韻覩極聖之恒存三
九於茲絕聽二七自此亡魂斯甚深之境界亦何易而

詳論悼稟識之多迷慨羣生之少慧保一異之四邪執
斷常之雙計怖夢虎於長眠翫空花於久翳縈結纏而
未解任漂流而莫濟背七覺而適昏染六慾而方滯何
理通而志隔既法是而情非忽鈴蜉而獨往久逃逝而
亡歸理寶藏於窮舍匿明珠於敝衣抱一真而不識縈
萬惱以歔歔嗟余既已傷於悟晚且又悲乎命局藉五
部之流耀蒙四依之睠錄涉講肆以開愚託禪林而遣
慾猴著鎖而停躁蛇入筒而改曲涉曠海以戒舟曉重

幽以慧燭絕諍論於封想息是非於妄情創歛緣於有
學終寂慮於無生顯真宗之實想達世用之虛名道莫
遣於始行暗弗拒於初明擬六賊其方潰冀十軍之可
平昏雲聚而還散心河濁而更清性海無增減行月有
虧盈疑兔足之致淺懼鴻毛之見輕為山託於始簞蔗
崑崙之可成

夢賦

真觀

昨夜眠中意識潛通類莊生之覩胡蝶如孔氏之見周

公雖夢想之虛偽亦心事而冥同爾乃見一奇賓傲岸
驚人無名無姓如鬼如神姿容閒雅服翫光新入門高
揖詣席誇陳余乃問曰夫邪不干正惡無亂蓋清濁異
流升沈各踐吾身披法鎧心遊妙典六賊稍降四弛方
遣大乘已駕小麾宜剪君是何人欲來何辯客乃對曰
久承名行未遑修敬常深注仰每軫翹詠忽覩光儀良
有嘉慶欲伸諮請願垂高命夫人生假借一期如擲倏
虹霓之驚天迅白駒之過隙豈不及年時之壯美取生

平之歡適或走名驥於長阡或駕飛輪於廣陌坐西園而召友敞南齋而對客出野外而操琴入閨中而撫石或復合樽促坐傳觴舉白重之以笑歌伸之以燔炙至如學富門昌德重名揚江東獨步日下無雙心為義窟身是智囊貂金仕漢佩玉遊梁高車駟馬桂戶蘭房列燕姬而滿側湊秦女而盈堂聞絃管之寥亮聽絲竹之鏗鏘何則一生之快樂亦千載而流芳豈能棲棲獨處傍無笑語剃髮除鬚違親背主形容憔悴衣裳藍縷既

闕田蠶復無商估等碎繒之百結似破襖之千補至如玉露朝團金風夜寒老冉冉而行至歲忽忽而將闌床空帳冷覆薄眠單絕子孫於後肩罷賓從之來歡欲以斯而為道亦得道之良難余乃聽之含笑畧陳心要徐而答曰省來說之矯張遂引誘於邪方欲以井蛙共海鯤而論大燭火與日月而爭光無異鷦鷯之比鵬翼培塿之匹崑岡爾既昏懵於生死亦耽染於玄黃唯知酣酒嗜慾峻宇彫牆豈識多財之被害寧信懷璧而為殃

佳味爽口美食爛腸貪淫致患渴愛成狂人生易盡物
理無常朝歌暮哭向在今亡忻懽暫有憂畏延長且世
間紛攘竟無閒賞五苦競來百憂爭往妻子翻為桎梏
親愛更如羅網私里恒弊嶺岢公事徒勞鞅掌榮華有
同水沫富貴實如山響然自沈淪倒惑恒懷歎毒不孝
不慈無道無德冒襟懽悵心腑讒賊自大憍奢志能苛
剋詎識仁義誰論典則無趣損傷非理貪慝見利爭往
臨財苟得失位失名亡家亡國命繩湔斷身城倒匄業

繫其頭鬼穿其肋冰池向踐火山方冒忍痛自知銜悲
誰告爾乃刀林擁聳劍樹差我爐飛猛燄鑊涌驚波稜
層鐵網碌礧灰河頭逢鋸解骨被磨庠舉身星散合體
滂沱凡諸苦難次第經過一朝踵此萬恨如何若夫正
法弘深妙理難尋非生非滅非色非心浩如滄海鬱似
鄧林隨機即赴逐感便臨內宣萬德外啟八音威降醉
象影攝驚禽形如滿月色似融金遂令尼隸脫屣梵志
抽簪然而出家之為道也則蕭散優游無欲無求不臣

天子不事王侯似無瑕之壁如不繫之舟聲樂不能動
軒冕不能留無為無欲何懼何憂戒忍雙習禪慧兼修
天人師範豪庶依投若夫為學日益為道日損損之則
道業踰高益之則學功踰遠故形將俗人而永隔心與
世情而懸反所服唯是三衣所餐未曾載飯從師則千
里命駕慕法則六時精懇濯慮於八解之池怡神於七
淨之苑至如道安道暕慧遠慧持赤鬚法主青眼律師
弘經辯論講易談詩開神悅耳析滯祛疑並皆揚名後

代擅步當時或與秦王而共輦乍將晉帝而同輿遂使
桓玄再拜而弗睨郝超千斛而無辭爾乃行因已正方
享餘慶四梵爭邊六天俱聘封畿顯敞國土華淨寶樹
瓊枝金蓮玉柄風含梵響泉流雅詠池皎若銀地平如
鏡妙香紛馥名花交映近感樂身遠招常命若夫六度
修成十地圓明靈智既湛種覺斯盈寂寥虛豁皎潔澄
清非起非作無造無營法眼不窺其色天耳不聽其聲
惡言不能加毀美譽無以為榮質非質礙之質名非名

相之名水火衝天而不懼雷霆震地而不驚雙林現滅而不滅王宮示生而不生既窮天下之至妙誰敢與之抗衡於是前來君子聞斯語已合掌曲躬歛眉彈指魂飛氣懾神萎志否踧踖無顏逡巡驚起自陳孤陋未知臧否追用感傷實懷慚恥今日奉教謹從命矣

古今禪藻集卷一